

# CHIRITA.



Chirita zebillen bein  
zokuak miratzen,  
jatekorikan ezer  
etzuben billatzen;  
eta nola gosiak  
zegüen irrikitzen,  
mokua maiz samar ark  
zuben irikitzen.

Bein ur bazterrera joan,  
bestian egatu,  
naizuben gauzik eziñ  
zuben ark eratu;  
alakorik batez *¡rau!*  
golpez zan beratu,  
ta euli mando baten  
aurrian geratu.

—¡A zer gauza gozua  
zaitena ingura,  
au bai gogoz sartuko  
detala barrura!—  
bañan asko jakina

izanikan ura,  
pensamentu bat sortu  
zitzayon burura.

Ikusi nairik bizi  
ote zan euliya,  
igarri zuben tranpa  
zegoala jarriya,  
ta diyo:—Naiz gosiak  
obe det bizipa,  
eta ez emen galdu  
jan nairik pistiya.—

. . . . .  
. . . . .

Gizona arki leike  
noiz nai apuruan,  
arkiturikan traba  
bere inguruan;  
juiziyoz bear da  
ibilli munduan,  
aurretik pentsatuaz  
chiriten moduan.

JOSÉ ARTOLA.

